

3794  
A. D. T. O. M.  
DISSERTATIONE SOLENNI  
**OPII**  
**CORRECTIONEM**  
**GENVINAM ET VSVM**

PRÆSIDE

DN. FRIDERICO HOFFMANNO

FACULTATIS MEDICÆ SENIORE

PRO

DOCTORIS GRADU

*PUBLICAE VENTILATIONI PROPONIT*

D. IV. Februarii MDCCII.

FRIDERICVS CRISTIANVS MÜLLER

dictus WOHLHEIMER, Manheimio-Palatinus.

---

RECUSA

*HALÆ MAGDEBURGICÆ,*

Typis JOH. CHRISTIANI HILLIGERI, Acad. Typogr.

ANNO MDCCXXX.







## PROOEMIUM



**D**Ecularia fata non modo habere Medicorum opiniones, sed & ipsa medicamina, res est extra omne posita dubium. Ita deprehendimus, certis temporibus, certas esse familiares sententias, imo æstimari & magno ubivis recipi cum applausu. Alio autem tempore eadem rursus deferuntur, damnantur, & novæ exsurgunt, mox tamen etiam, prioribus repetitis, obsolescunt. Simili ratione procedit cum medicamentis, & cum ipsa medendi nonnullis morbis methodo. Mox enim hæc vel illa magnificæ sunt famæ remedia, quæ divinam, hoc vel illo morbo laborantibus, præstent opem, sive certissima morborum sint præsidia. Pari ratione hæc vel illa methodus, sanandi v. gr. febrem, pro certa infallibilique traditur ac venditatur: paucis sæpius tempore interjecto, alii accedunt, qui hanc spernunt, & meliorem substituere ac in scenam producere conantur, sique speciem quandam auctoritatis & existimationis habent,



& speciosum accedit verborum artificium, atque ex novitate rerum (cuius natura humana est appetentissima) ebuccinatio, priora rejiciuntur, & hæc acceptantur. Hoc per aliquot annos continuato, ubi sibi tributam famam ac laudes non sustinent, in alia mox animus convertitur. Merito autem ille deplorandus mos est; quod certi Medici quandoque plane in contrarium currant, dum scil. unus hoc remedii genus ad cælum usque extollit, inque omnibus morbis, ceu panacæam, commendat: alter ex converso pro noxiosissimo illud declarat. Luculentum huius rei exemplum habemus in opio; quot enim diversæ penes Practicos exstant & exstiterunt circa eius usum opiniones? Quidam familiarissime ipso utentes, legitima dosi exhibitum, in omnibus ferme morbis ceu Divinum extollunt præsidium. Alii idem instar veneni timent, & fere nunquam suadere eius usum volunt, &, quod maximum est, quævis pars suam allegat experientiam, suas item quævis rationes. Et hoc in aliis quoque contingit. Certe qui talem Medicinæ faciem speculatur, is, ut plane ab ea addiscenda abhorreat, non mirum est. Quod si autem rem penitus, ut meretur, æstimemus & pensitemus, culpa profecto non est rejicienda in artem, non est rejicienda in remedia, neq; etiam in experientiam: sed in ipsas personas, quæ vel ex magna credulitate, vel ex affectu, aut intempestiva sui æstimatione, dum se corrigere postea nolunt, citra præcedentem accuratorem pensitationem, examen, & effectuum, secundum solida & vera, corporeis rebus competentia, principia, ponderationem, & ex falsa quadam hypothese, rationum deductione, in huius vel illius remedii nimiam commendationem



nem vel contemptum incidunt. Existimavi semper, sicuti in compluribus rebus, multisque actionibus, ita quoque in Medicina, tritum illud commendatissimum esse debere:

- - - *Medio tutissimus ibis,*

& extrema omnia evitanda. Hoc autem medium ut inveniamus, & solido iudicio, ab affectibus vacuo, & solidis principiis in Medicina, & attenta effectuum observatione, sive experientia, opus est. Et videtur jam, DEO sit laus, meliori facie nostris temporibus Medicina splendere, ubi non tam facile auctoribus, etiam cum maxima asseveratione dicentibus, fidem habemus, & nihil approbamus, nisi accuratum prius sustinuerit examen per experientiam & rationes, quæ non amplius, ut olim, ex cerebro petuntur, sed ex principiis & legibus motus demonstrativis solis atque unicis. Placuit autem nobis, cum specimen inaugurale edere fuerit mandatum, præ aliis, in exemplum sumere *opium*, ceu vexatissimam hodiernis moribus medicinam, breviter ostendendo, an, & qualem habeat usum? & maxime omnium, qua ratione præparari ad usum medicum opportunissime, & tutissime componi ac misceri possit. DEUS T. O. M. sicuti aliis nostris laboribus huc usque clementissime benedixit, ita & huic gratiam suam non denegabit, cujus benignissimam opem humillimis imploramus precibus.

§. I.

**P**Rimarius equidem nobis est scopus, demonstrare: quanam melior sit correctionis opiatorum modus, quanam præparatio ac compositio? nihilominus, antequam nos ad hoc accingamus negotium, operæ erit pretium, de-



cernere prius ac definire, an nempe opium in praxin medicam tuto recipi, & quendam medentibus usum foenerari queat, nec ne? Nisi enim hæc res prius fuerit expedita, reliquus omnis labor irritus erit atque frustraneus. Placet itaque breviter strictimque argumenta, quæ proferri possunt & solent ab iis, qui opiatorum usum pessundare student, perspicere atque evolvere. Primo autem dicunt opium crude esse venenum, siue animantium naturæ & vitæ admodum infensum, quoniam nonnullas bestias in paucis granis necat, quales sunt feles, qui, deglutita pauca opii quantitate, mox convulsionibus, & miris membrorum agitationibus torquentur, & brevi animam efflant, cum tamen alias, si ulla animantia, certe iidem vita stabili, nec facile a quadam injuria destructibili, fruuntur. Talismodi exempla, pulchre annotata legere licet in *Borrichii* commendatissimo tractatu *de somno ac somniferis*. Deinceps assertum suum comprobant variis observationibus & lethalibus exemplis, ubi opium non tantum pejorem reddidit morbum, recidivas produxit lethales, verum etiam multos e vita substulit & æternum iis somnum conciliavit. Tertio loco hanc afferunt rationem, quod opiata motus naturæ sistant, cum tamen vita & corporis nostri conservatio unice dependeat a motu sanguinis, cui deinde subordinati sint debita spirituum secretio, nutritio & per necessaria excrementorum separatio. Quæ cuncta, non sine dispendio sanitatis, ab opiatorum exhibitione labefactantur, vel destruuntur. Quarto loco, utut negari non possit, in doloribus, spasmodis, convulsionibus, febrili humorum commotione, motus esse excessivos, exorbitantes; nihilominus eosdem a prudentissima natura bonum in finem excitari asserunt, ut nempe expellatur, quod infensum est & hostile naturæ microcosmicæ: ideo sinendos illos motus, minime autem sistendos esse arbitrantur. Verum enim vero, quamvis non exigui momenti hæc sint rationes, placet tamen de his omnibus nostram sententiam, cum pace vero omnium, (animus enim non est quen-



quēquam in tota vita, multo minus quando placide & modeste opiniones examinamus, vel tantillum lædendi) brevibus exponere.

## §. II.

Ad primum itaque reponimus, opium neutiquam in venenorum classem esse referendum. Tota enim Turcarum & Indorum natio contrarium per tot secula confirmat, dum eo partim ad delectationem, partim ad animositatem, Venerem & majorem mentis aciem utuntur. Prostant etiam passim memorabilia exempla & observationes, ubi in nostris regionibus opium in magna quantitate, citra ullam noxam vel sanitatis detrimentum, fuit assumptum. Legi hac de re possunt *Miscellanea Nat. Curios. Dec. I. A. II. p. 127. 395. Dec. I. A. VII. p. 104. Dec. I. A. IV. & V. p. 290. Dec. II. A. V. p. 364. Dec. II. A. X. p. 77. 152. & 154. &c.* Notum mihi inter alia est exemplum amplissimi cujusdam viri Berolini degentis, perpetuo valetudinarii, hypochondriaci & podagrici, qui ad minimum bis in septimana pilulas Wildegansii assumere cogitur, a quarum usu insignem actionum alacritatem, robur, placidumque somnum experitur. Lubenter autem fatemur & admittimus, si in administrando ullo remedio opus sit prudentia quoad dosin, temperamenta, morbos & morborum tempora, certe in opiatis esse, maxime vero omnium, si sint male præparata. Si enim eadem tunc propinare velimus, quando motus & vires deficiunt, uti non raro ab imprudentibus Medicis fieri solet, utique de sanitate, imo de vita, in morbis præsertim acutis & malignis, actum fore quis dubitabit? Omnibus porro generosis, etiam analepticis & volatilibus remediis, hoc solenne est, ut, si intempestive vel præposlere usurpentur, perniciosam, instar veneni, vim exserant, imo in venenum materiam peccantem non adeo mali moris quandoque transmutent. Deinceps certum quidem est, feles a minima opii quantitate protinus necari: ex eo tamen minime inferre licet absolutam venenosam eius qualitatem. Notum enim est, ab u-

nico



nico cochleari spiritus vini identidem mox concidere mortuos, quod etiam curiosi observarunt de amygdalis amaris, quæ homini egregia sunt medicina, felibus autem venenum. *Vid. Beati Wepfferi elegantissimus, de Cicuta Aquatica, tractatus Cap. XLX. hist. IV. p. 241.*

### §. III.

Præterea certum ac verissimum est, corporis nostri durationem, sive vitam, sine perenni ac jugi sanguinis & humorum motu ac circulo durare non posse, utpote hoc eodem non modo particulæ impuræ, heterogeneæ separantur, partesque nutriuntur, & spiritus, sive tenuissimum cerebri ac nervorum fluidum, generatur, sed & omnis putredo atque corruptio, tam per impurarum istarum sordium secretionem, quam quod potentiæ externi fluidi intestinus ac progressivus sanguinis motus resistat, & sic putredinosam mixti dissolutionem impediat, a corpore avertitur. Certissimum porro est, & a sapienti antiquitate dudum notatum, atque a *Sydenhamo* feliciter & sobrie repetitum, naturam, sive totum illud corporis humani artificium, motibus, quos tam res naturales, quam morbificæ causæ subinde excitant, non modo se ipsum conservare, sed & morborum fomitem temperando, sive coquendo, & exterminando, tam quantitate, quam qualitate infensam materiam, certis temporibus per congrua evacuatoria eliminare: quam sententiam jam ante hos octo annos tractavit & illustravit *Excellentissimus Dn. Præses*, cui pro summis in me collatis beneficiis aeterno me nexu devinctum pia mente agnosco, in dissertatione de prudenti medicamentorum applicatione in tempore, & postea in illa, de naturæ morborum medicatrice mechanica. Nullum hinc est dubium, quod motus hi, antequam sublata fuerit causa morbifica, sive ab ipsa natura sola, sive arte adjuta, sisti neutiquam debeant, quod & nullus unquam, ut ego quidem memini, ex recentioribus, qui ex physicis principiis Medicinæ præcepta



cepta tractant, asseveravit; & utique tunc omnia motus si-  
stentia, adstringentia, pessime cedunt. Aliter autem com-  
paratum est, si motus isti, qui in corpore per & ob causam  
morbificam activam excitari solent, quales febriles, spa-  
smodici, convulsivi nimii sunt & excessivi, ubi non ampli-  
us materiæ peccantis, sed motuum læsio corpori minatur  
periculum, sunt temperandi, moderandi, & annon id com-  
mode præstari possit anodynis decenter adhibitis? ubi uti-  
que tuemur hic affirmativam sententiam, utpote sæpius ac-  
cidit, ut ex nulla materiæ præsentia, solo animi motu, vel  
per consensum, vel etiam a causa quadam externa lædente,  
sicuti fit, quando tendo vel nervus punctura læditur, e-  
normes motus, absque ulla necessitate, absque ullo scopo  
concitantur plane aberrantes, tales motus utique nature si-  
stere oportet, unde etiam non absque ratione theriaca, quam-  
vis sola non sufficiat, venenorum antidotus certissima habi-  
ta fuit a veteribus, utpote venenatæ particulæ non tanta  
facultate pollent corpori nocendi, quam intensissimi isti mo-  
tus, qui a veneno producuntur. Accedit & illud, quod secre-  
tio & expulsio cuiuslibet peccantis materiæ in corpore, non  
commode sub violento sanguinis & spirituum motu expe-  
diri possit, sed potius requirat pacatum quodammodo sta-  
tum, ac motum non adeo fortem, maxime, cum sub tali con-  
citatissimo sanguinis intestino motu, materia peregrina plus  
intime cum sanguinis particulis jungatur ac uniatur,  
quam ut ab illis secessionem faciat. Sedativis itaque & opus  
esse in foro medico, ex eo firmiter existimo concludi posse.  
An autem præsentius detur opio, rite præparato & correcto,  
præsertim ubi graviores motus sedandi sunt, merito dubi-  
tandum est. Et quando vetustissima Medicinæ respicimus  
tempora, nulla remediorum genera per tot seriem seculo-  
rum in usu, ac æstimatione magis constanter permanserunt,  
quam quæ opium habent pro basi, ex quorum censu emi-



nent *theriaca*, *mithridatium*, aliaque. Confirmat & hoc nostrum assertum autoritas gravissimorum & solidissimorum Practicorum recentiorum, inter quos merito reponimus, viros omni laude majores, *Platerum*, *Sylvium*, *Ettmüllerum*, *Craanium*, *Dan-Ludovici*, *Michaëlis*, *Waldschmidtum*, *Wedelium*, *Albinum*, *Sydenhamum* &c. ex quibus, si quid solidi in praxi addisci potest, certe ex iis haurietur, aliis tamen minime neglectis: hi autem omnes in frequentissimo opium habuerunt usu: Equidem fateor lubenter, si ullum medicamentum circumspectionem & prudentiam postulat Medici, & si ullo quoque vulgo graviter peccatur, certe id fieri per opiata & narcotica, experientia optima veritatis parens, confirmat; abusus tamen nunquam tollit & tollet usum. Placuit mihi in eo valde *Ludovici* sententia, qui scribit: ob meticulosam opiatorum intermissionem, æque multos, dirissimis confectos symptomatibus, vel vigiliis continuatis exhaustos, occidisse, atque per Empiricorum periclitationes.

#### §. IV.

Clarissimus *Helmontius* in *Tr. Duumv. p. m. 64.* scite scribit: Felix æger, cujus auxiliator Medicus novit lethalia e papavere separare, alioquin sane nocuum cum proficuo simul assumunt, unumque impedit alterius profectum. Equidem crudum opium non est venenum, sed sæpius hoc præferendum ducō opii tosti, seu exusti, aut inconcinnorum ex eo præparatorum extractorum nimis dosibus: nihilominus tamen firmiter censeo, præparatione indigere, ut utile ab inutili separetur, & nova etiam cum aliis unione seu compositione, ut ejus vis vel corrigatur, vel emendetur. Primo omnium autem spectanda est opii origo. Est nempe illud succus inspissatus, qui ad nos ex diffitis locis venit. Duplex autem secundum accuratiores historiæ naturalis scriptores datur, nempe purum, quod nihil aliud est, quam liquor



quor albus instar lactis, qui emanat ex capitibus papaveris nigri, mediante incisione apertis, qui successive in sole coagulatur, & mutat colorem suum album in brunum, quod verum est opium, quo Turcæ utuntur, tam ad famem sustinendam, quam ad alacritatem in præliis & conflictibus sibi comparandam: tale autem ad nos propter raritatem non amplius adportatur, sed hoc quo nos utimur est succus, per expressionem capitum & foliorum papaveris factus, deinde in consistentiam extracti, mediante igne, redactus. Veteres vocarunt meconium.

## §. V.

Res jam postulat, ut paulo sollicitius inquiramus, in elementa, sive principia, opium constituentia: animadvertimus autem in eo diversas & distinctas inter se substantias: quod si enim calidam opio affundimus aquam & solutionem leni coctione decenter facimus, binæ ferme opii partes in ipsam transeunt; inspissata hæc solutio extractum constituit, quod rursus in omni liquore aqueo est solubile, neutiquam autem in spirituofo & oleoso; unde patet, ex gummis eis mucilaginosis, viscido-terreis hanc partem esse compositam magis, quam ex resinosis & pure sulphureis oleosis, utut hæ ipsæ non penitus a gummosa opii parte possint excludi, utpote & hoc, igni admotum, ardet; indicio, sulphur inesse, sed immersum lentis, gummeis partibus, non secus ac sanguis exsiccatus ardet, nec tamen solvitur in spiritu vini rectificato. Substantia autem quæ remanet ab extractione gummosa, magna est terreum viscosum, quod tamen particulas quasdam pure resinosas adhuc fovet sub sinu suo: etenim si ipsi affundimus spiritum vini rectificatissimum, sub debita digestionem imbibit ipse insignem adhuc portionem ex opio, & tingitur colore ex bruno rubicundo: Essentia hæc si instillatur aquæ, lactescit, manifesto documento, resinosam & oleosam



leosam substantiam fuisse resolutam: Quando inspissatur, largitur extractum resiniforme, quod promptissime suscipit flammam, & totum consumitur, id quod cum gummea parte non æque facile accidit. Curiosum est, quod in inspissatione spiritus vini sal quoddam tenuissimum, spiculatum, albicans, instar florum benzoës, quod & Excellentissimus *Wedelius* annotavit in *opiologia* p. 70. jucundo spectaculo sese simul præsentet. Tertia substantia, quæ remanet a gummosa & resinosa extractione, terra est inutilis & effœta. Insuper memorandum etiam quid est de peculiari opium constituyente principio, quod nempe exiguum quidem, sed magnæ soporiferæ virtutis est; & deprehenditur illud in superficie solutionis opii factæ cum aqua, nihilque aliud est, quam pinguedinosa quædam, spumans, viscida materia, quæ supernat, odoris valde graveolentis, foetidi.

#### §. VI.

Examinatis sic opii diversis partibus, necessarium jam est, ut inquiramus, quænam maxime utiles, & desideratam sedativam vim custodiant, quæque inutiles, imo magis damnosæ existant? Paucis autem & sine ambage, nostram hac de re sententiam declarare hoc loco allubescit. Statuimus nempe, elementum illud, quo opium agit, anodynum & soporiferum, esse nihil aliud, quam sulphur eius tenuissimum, evaporabile, sive, quod in copiosissimos vapores dispergitur, & in auras avolat: hoc vel immediate ipsos nervos & membranas nerveas sua replens vaporositate, spirituum distributionem atque influxum impedit, vel adhuc magis in sanguinem delatum, mirifice sese expandit, & hac facta expansione rarefactiva, arteriolarum minima in cerebri corticalli substantia distendit, sanguinisque liberiores circulum impedit, sicque spirituum genesis imminuit, & ita motus omnes, in toto corpore segniores efficit, uti fusius ab

Ex



Excellentissimo Dn. Præsidi notatum *in diff. de mechanica operandi ratione opiatorum.* Quod autem in tenuitate partium sulphurearum, earumque blanda ἀναδυμνάσει consistat opirvis, vel ex eo liquido apparet, quod etiam forinsecus tantum admotum, nempe temporibus, in emplastro, linimento, vel clystere, effectum suum exserat. Clarius autem illud apparet, si destilletur cum aqua simplici, vel spiritus vini super id abstrahatur, inde enim producta aqua nobilissima vi pollet anodyna, tutissima, contra vulgarem opinionem: Spiritus autem vini opiatus, & externo, & interno usu identidem probatissimus ad eosdem reperitur effectus. Simile quoque deprehendimus in floribus papaveris rhæados, ubi aqua ex ipsis parata, longe tutior ac melior est omnibus aliis ex eis paratis; unde iam perspicua fit ratio, quare, si, in præparatione eius extracti, opium diu in aqua coquatur, & ingens aquæ copia affundatur, ac vehemens calor subministratur, extractum anodyna sua virtute privetur, adeo, ut ejus modi extracti, fortiter sic excocti, grana decem non tantum efficiant, quam duo grana lenissimo calore præparati extracti. In universum enim hoc tenendum est, volatile esse soporiferum principium, unde aqua, calore & aëre transmittitur in auras. Manifesto id quoque apparet in absynthio, quod est herba sulphurea, caput sua replens vaporositate, si autem in aqua coquitur, virtute hac penitus defraudatur, in auras nempe avolante tenui, quo constat, sulphure.

§. VII.

Quod si iam secundum hæc principia, ipsamque experientiam examinemus quatuor distinctas ex opio præparatas substantias, quænam ex iis præcipua splendeat sistente tumultuantes motus virtute, per se iam liquet, eam esse, quæ maxime est volatilis: & contra, fixiorem inertem, segnem & penitus orbam hac virtute. Afferimus itaque, eandem quæ supernatat, exiguam quidem, sed omnium esse efficacissimam.



Unde est, quod canes, qui ab integra opii drachma non per-  
eunt, aliquot hujus substantiæ granis interficiantur. *Willisus*  
*Pharm. Rat. part. I Sect. VII. cap. 3.* hoc fecit experimentum,  
gregario nempe cani exhibitæ duæ opii drachmæ ipsum non  
interficiebant, sed stupidus inde factus difficulter respirabat,  
& intra semihorulam alvum cum foetore tetrissimo copiose  
deiciebat, & vegetus evasit. Ita nuper quoque ipsemet, bi-  
nis successive vicibus XV. grana opii devoranda cani dome-  
stico porrexī, a quibus plane non alterabatur. Postea il-  
lud idem institui experimentum cum substantia illa pingue-  
dinosa spumante, quæ ordinario supernatat solutioni opii  
cum aqua factæ XII. granis: scil. objeci ea cani in pane bu-  
tyraceo recondita devoranda; inter quatuor autem hora-  
rum spatium e vivis excessit. In hujus rei confirmationem  
allegare hoc loco possum simile experimentum in nuperis,  
Hanovia ad me datis literis, mecum communicatum a Cla-  
rissimo Domino Doct. Van den Velde, Fautore nostro integerrimo.  
Hic cani domestico mediocris magnitudinis, vigili de cætero  
& satis pernici, haud ita pridem humoris illius pinguis, ex  
opii coctione collecti, grana X. masticatæ panis medullæ  
subacta, ingessit: quibus devoratis, elapso horæ unius  
quadrante, oculis nivere, capite nutare, & ad somnum  
se componere cœpit, sed frustra. Mox enim quasi expa-  
vescens surrexit pedibus, tremuit, ejulavit, crebro & concita-  
to respiravit, linguamque æstu squalidam, tanquam cursu de-  
fatigatus, exseruit, & hinc illinc incerto & titubante latus  
gressu, donec labantibus pedibus succubuerit, & in terram  
prostratus, alto quasi sopore oppressus fuerit: sonoros hinc  
& crebros edidit ronchos, quos inter frequentes, ingentes  
primo tendinum subsultus, mox convulsiones atrocissimæ  
sequebatur, quibus per bihorum varie jactatus, tandem  
intercepto spiritu, vivere desit; adeo ut pateat, longè maio-  
rem efficaciam subtilissimam hanc opii partem præ cæteris ha-



**habere.** Jure elicere quis poterit ex his allatis experimentis, virulentam hanc esse opii partem, quoniam animalia interficit. At vero, potius statuimus, non ratione venenositatis cujusdam occultæ mortem sequi, sed propter nimiam hujus substantiæ activitatem: probe enim custodiendum est, ex libra una opii vix duas vel tres drachmas separari posse huius materia, quæ quasi illud principium vaporosum, quo operatur opium, concentratum, sibi que relictum est: Unde concludimus, unum ejus granum plus præstare, quam X. extracti. Utique igitur cautissime est procedendum cum subtiliori hac parte, quæ non, nisi in minutissima quantitate, est propinanda.

### §. VIII.

Quod attinet ad resinofam substantiam, quæ ex magrate terreo, mediante spiritu vini extrahitur, hanc, uti dictum, virtute anodyna cassam deprehendimus, & cum grana hujus quindecim canis devorasset, nil inde sensit incommodi, nec levem quidem somnolentiam induxit, adeo, ut errare mihi illi videantur, qui opii virulentiam in resina collocarunt, quasi ventriculi & intestinorum membranis nimis adhærescens, nauseam, anxietates & cardialgiam efficeret. Id quidem verissimum deprehenditur, quod, uti jam dudum Celeberrimus *Wedelius* annotavit, opium cum spiritu vini solutum, & in essentiæ vel extracti forma propinatum, symptomatibus variis magis sit infensum, vomitusque exciter, quam si cum phlegmate aceti extractum præparetur, ubi nunquam vomitum, vel saltem nauseam contigisse observavit. Hujus autem effectus atque phænomeni rationem mox suggeremus. Omnium autem solertissimorum consensione gummea pars, quæ cum aqua extrahitur, celebratur pro optima & tutissima: quæ nec vomitibus, nec diarrhoeis, nec anxietatibus facile infensa est, & tamen activitatem in sedativo effectui satis luculenter præstat. Hæc quoque in  
in-



insigni quantitate a cane devorata, truculenta nulla sympto-  
mata excitavit, ut potius post lenem somnum, vigor & ala-  
critis major fuerit notata. Merito autem hic quæstio oritur,  
in quonam principio lateat pernicialis & noxia opii vis, cum  
experientia confirmet, non tam a crudo opio, quam essentia  
eius cum spiritu vini parata, item extractis ejus, magnas anxie-  
tates, cardialgias, nauseas, subsequi, & mori animalia? Vi-  
detur itaque nobis verosimile, in sulphure opii sibi relicto,  
& a mucilagine sua separato, & acriori facto, conquiescere  
soporiferam & nervis etiam molestantem virtutem, quæ sæpius  
diarrhæas, vomitus & anxietates causetur, non modo acri sa-  
le stimulante, sed & dum in instanti nimia sua activitate san-  
guinis motum circa primas vias sistit: unde natura quasi hac ra-  
tione irritata violentas istas motiones efficit: ut a resinoso prin-  
cipio hæc pathemata minus congrue deducantur. His positis  
non amplius ignota erit ratio, qua de causa opium solutum  
in spiritu vini plus damni inferat, quam si in aqua solvatur,  
quod non: uti diximus, sit ob resinam, quæ expers omnis  
activæ noxiæ virtutis est: sed quoniam spiritus vini, parti-  
culas oleosas, pure sulphureas, cui tenuissimum sal impli-  
citum est, extrahat & liberet ab involucris ac compedibus  
mucosis, viscidis, quæ nimiam ejus activitatem ac volati-  
litatem temperare ac refrænare aptæ erant. Quod autem  
hæc sententia fundamento non destituta sit, considerare pla-  
cet oleum ex tabaco extractum, quod pariter sale acri stimu-  
lante turgidum est, & verum venenum, si vulneri immitta-  
tur in animantibus, vel nervus fauciatus ipso tangatur, uti pro-  
be annotavit *Borellus*, mox fuisse convulsionem, & lethalia  
insecuta symptomata. Consensum enim ferme inter omnes  
eruditos reperimus, oleum in opio quod continetur, esse ma-  
tricem athmosphæræ copiosissimæ anodynæ & soporiferæ,  
quæ per sanguinem in corticem cerebri recepta, & sanguinis  
ibi motum, & spirituum genesis pacatiorem efficiat: In senten-  
tiam autem adducamus *Petrum Severinum*, qui in *idea Philosophiæ*



cap. 7. refert, se in opio, facta substantiarum separatione, deprehendisse sulphur, seu oleum plane narcoticum. *Helmontius*, in *Tract. duumvir.* invenit salem acrem sudorificum, & oleum amarum soporiferum. *Quercetanus Lib. I. defensionum, cap. 20.* reperit in eo oleum narcoticum flammam concipiens. *Excellentissimus Wedelius in Opiol. lib. I. Sect. I. cap. 9.* oleum nigricans copiosum per destillationem extorsit, probe autem hic tenendum est, oleum quo opium agit non esse crassius, sed valde tenue & volatile: crassum enim sulphur, quoniam difficulter explicatur, tales effectus, opio proprios, minime præstare poterit. Conspicimus id clare in semine papaveris, ex quo *Celeberrimus Borrichius* magnam olei per destillationem elicuit quantitatem: quod tamen in somno provocando longissime cedit opio.

§. IX.

Judicamus utique, desideratissimam anodynam vim in temperata opii parte esse quærendam, quæ est ipsa gummosa: hæc alit sulphur in magna quantitate, nam accenditur: interim tamen, innexum, implicitum & intricatum illud est variis particulis viscidis, mucilaginosi, & tenerioribus terreis, quæ ejus nimiam activitatem & celerrimam operationem moderantur, refrænant atque dispensant: omnia enim temperata & moderata quæ successively & sine impetu agunt, naturæ magis grata & amica sunt, quam quæ summa agendi activitate sunt instructa, simul & semel, uno impetu ac celerrime corpus alterant. Quapropter optima ratione *Celeberrimi Viri, Ludovici, Wedelius, Febure, Lemmeri, Glaferus & alii* extractum opii cum aqua simplici vel phlegmate aceti præparatum omnibus aliis præparationibus & correctionibus præferunt. In *Act. Erud. Lips. Mens. Octobr. Anno 1701. p. 441.* recensetur mysterium opii revelatum *Dn. D. Jones*: Recipit nempe opii octo uncias, aquæ pluv.



destillatæ uncias XXIV. In loco temperato & vase probe obturato reponit, quotidie ter quaterve agitando; post sex dies per chartam bibulam solutionem filtrat & oleo dulci affuso sub titulo panaceæ liquidæ asservat: qua obtenta, mox ad omnem gummosam opii portionem aqua pluvia destillatam tamdiu affunditur, quousque rubicunda elicta tinctura fuerit omnis, pariter filtranda, simulque in balneo ad extracti, solidam opii panaceam constituentis, inspissanda consistentiam. Notandum hic merito est, etiam differentiam quandam dari in parte gummosa quæ aqua extrahitur, dum nempe illæ partes, quæ leni calore vel infusione calida in aquam cedunt ex opio, longe teneriores & subtiliores, adeoque ad anodynam & somniferam vim aptiores sunt, quam illæ, quæ coctione demum cum aqua solvuntur, ceu crassioris texturæ, & paulo fixioris indolis: unde non incon-sulto, sed optimo ac felicissimo successu, præclarus ille Auctor infusionem tantum cum aqua, calido in loco, vase probe obturato, celebrat, ne volatilis portio desideratissima secedat in auras, sed potius ipso in menstruo conservetur: hinc priorem infusionem tanquam laudanum liquidum in usum servat; reliquam autem crassiorem portionem solutam in extractum coagulat. Ex eodem fundamento procedit quoque laudatissimi Sydenhami liquidum laudanum, qui vinum Hispanicum opio in frustula conciso infundit una cum croco, caryophyllis, nucista & cinnamomo, & sic citra coctionem adeoque deperditionem substantiæ tenuis sulphuræ, vel inmutationem texturæ opi, ipræstantissimi usus remedium parat.

### §. X.

Ex his jam dictis & adductis, nemo non facile perspiciet, subtiliorem & solubiliorem in aqua opii partem esse selectissimam, ad usum maxime internum accomodatam, neque eam  
ullo



ullo modo in crasi & textura sua immutari ac destrui debere: nam innumeris experimentis, mechanico-chemicis, compertum est, in textura, crasi ac nexu partium energiam atque virtutem potissimum conquiescere, qua sublata & immutata, mox evanescit cum ea pristina efficacia, adeo, ut sæpius quod antea erat medicina, jam veneni indolen redoleat. Ex hoc jam principio & fundamento in proclivi erit dijudicare de variis & diversissimis institutis veterum & recentiorum præparationibus & compositionibus ipsius opii. Et primum patet, effumationes, tostiones quas veteres habebant in usu, nullius esse momenti vel pretii, cum hac ratione penitus nobilissimum hoc simplex privatur activo suo elemento. Et rursus non amplius ignotum erit, quare correctiones istæ cum acidis vehementioribus spiritibus nullum invenire possint locum, quoniam hoc pacto volatile illud tenue sulphur figitur, coagulatur & obtunditur, omnia enim acida concentrata, quæ cum oleis destillatis mixta sunt, eorum penetrantiam & agilitarem non modo retundunt, sed & firmum stabile corpus fixioris naturæ, mutuo connubio factò, inde formant: quapropter non immerito improbamus omnes extractiones opii factas cum spiritu vitrioli, spiritu salis; item cum languidioribus, cum succo citri, aceto destillato &c. Quod attinet ad spirituosam menstrua, in superioribus jam deductum est, iisdem magis efferari opiatorum vires; hæc enim, cum nexum mixti disjungant atque immutent, oleosas, salinas, volatiles a mucidis terreis separando, non possunt non & vires quoque simul immutare: utut enim oleoso principio opii narcotica vis maximam partem sit adscribenda, nihilominus sibi relictum & purum, plus nocet nervis, & texture spirituum infensum est, nisi sub involucro & contextu particularum temperatarum, mucilaginosarum terrestrium involutum custodiatur: hanc ob causam jure meritoque repudiamus omnes illas essentias, omniaque extracta cum spiritu



ritu vini facta. Si enim quippiam deleteriam vim huic simplici affricat, certe est menstruum spirituosum. Et tametsi olea tam destillata, quam expressa, nullum jus vel potentiam in dissolvendo opio exserere valeant, menstrua autem spirituosae oleis istis æthereis essentificata & imbuta, extractionem quandam moliantur, nihilominus & talem correctionis rationem privamus atque excludimus a legitimo & convenienti usu. Restat jam, ut etiam circumspiciamus, quid alcalina menstrua, tam fixa, quam volatilia, præstent in emendatione & exaltatione opiatorum virtutis. Solenne pluribus fuit, cum tinctura salis tartari, cum tinctura antimonii acri, vel tartarifata, debita digestionem facta, elegantem tincturam, summa rubedine infectam extrahere, cujus generis laudana *Willisio*, *Ettmüllero*, *Tackenio* & *Dn. Præsidi* olim etiam perquam familiaria fuerunt. Jam autem compertum est, quod alcalia salia texturam sulphurei principii maxime recludant, unde etiam spiritus, qui præparantur ex mastiche, benzoë, succino, myrrha, balsamo Peruviano, si prius hæc resinosa corpora oleo tartari p. d. probe fuerint macerata, longe fortiores, penetrantiores sunt, & oleo tenui balsamico imbuti, quam si destillatio tantum cum solo spiritu vini rectificato celebretur. Curiosum hoc est, quod, si opio soluto in aqua affundatur oleum tartari p. d. ebullitio quædam observetur, & odoris immutatio, dum maleolentes vapores assurgunt. Statuimus itaque, alcalia sulphureas quidem tenues oleosas opii partes a suis separare compedibus & vinculis, sed simul etiam texturam oleosi opii principii quodammodo immutare, quod patet ex ebullitione & odoris immutatione, unde fit, quod essentiæ cum alcalinis & spirituosis mensstruis paratæ, longe meliores sint ac tutiores, quam si cum solo spiritu vini fuerint adornatæ. Et ut ut per hanc rationem non penitus repudiandæ sint, nihilominus, cum crasin mixti aggrediantur, abstinere consultius duco ab iis, dum selectiora nobis cognita sunt. Tandem etiam aliquid



quid monendum ducimus circa fermentationem opii, quæ cum variis vegetabilium succis, præsertim succo cydoniorum institui solet; sua non sunt laude defraudandæ, & usu hæcenus egregio se approbarunt, dum nempe cydoniorum succo gummea opii pars solvitur, & facta deinde cum sale tartari fermentatione, sulphurea opii pars subtilisatur & exaltatur. Posset quidem hic quispiam interponere, mixturam ac crasin opii hoc pacto etiam destructam iri, & secessionem principii oleosi a mucido terrestri fieri: at vero, utut talis mixti alteratio utique quodammodo hic concurrat, nihilominus mucilaginosum illud & blandum terrestre acidum, quod in cydoniis est, separatum & exaltatum illud sulphur denuo in se recipit, & cum ipso sese connectit, ut noxa ac damnum inde expectari non debeat. Si tamen fateri licet quod res est, & hanc corrigendi methodum longe postponimus simplici solutioni opii cum aqua pluviali factæ sub lenissimo calore in vase clauso, uti optime *Jones* hoc ipsum jam monuit; hæc via valde est compendiosa, facilis & tuta, cæteris omnibus magis operosis, quibusdam plus damni quam emolumenti adducen-  
tibus.

### §. XI.

Hisce discussis, ordo jam postulat, ut varia ex opio composita paulo accuratius consideremus, & selectiores mixtiones tradamus: antequam autem hoc demus effectui, paucis tantum inquirere placet, in quam forma opiata commodissime possint propinari. Habemus maxime formam solidam & fluidam seu liquidam, ubi non possumus dissimulare: convenientissimum nobis videri usum opii liquidi, paucis tantum casibus exceptis: utpote non modo celerioris operationis perpetuo fere medicamenta liquida sunt, dum citius disperfantur per totum corpus; verum etiam facilius rursus effectui præstito transeunt & exhalant. Illud autem habent incommodi in solida vel pilulari forma exhibita opiata, quod vel dif-



facilius solvantur, membranis & valvulis intestinalibus firmiter adhæreant, & eas partes ubi jacent maximis incommodis, præferim stupore, vellicatione, afficiant. Unde non sine ratione conquestum est sæpius inter Medicos, opium ventriculo esse hostile: meretur adduci in hanc rem egregius locus ex *Ettm. dissert. de opii virtute diaph. qui cap. ut. §. 3. scribit: sane non leviter hostile videtur ventriculo opium, cujus ut digestionem ordinario turbare observatur, ita etiam gravaminis & pressionis circa ventriculi regionem sensum, & vix explicabilem ab agris molestiam circa præcordia opiata inducere solent, idque præsertim sicca in forma, omnium maxime pilulari si propinentur.* Unde etiam conqueritur *Wedelius in Opiol. p. 32. & 33.* ab opio pilulari in forma exhibito, vomitum inprimis oriri. Ulterius, liquidum laudanum solido eam ob rationem videtur præferendum, quod in evaporatione, dum solutio redigitur in extractum, multum perire solet de substantia subtiliore desideratissima anodyna. Attamen existimamus, ubi opium in primis viis sedativum & sistentem quendam usum præstare debet, uti in diarrhoeis & dysenteriiis, plus efficaciam tunc a solidis, quam liquidis expectari debere.

## §. XII.

Nunc e re quoque fore existimo, ut varias opiatorum compositiones correctionis causa potissimum institutas perlustremus. Veteres probe perspectum, & experientiæ sensu cognitum habebant, opium pacativam & somniferam quidem custodire facultatem: at sæpius magna simul creare symptomata, imo vitæ esse infensum; unde omne studium ac operam collocarunt in eo, ut eam, quæ noxia esset, virtutem corrigerent ac emendarent. Constans autem tunc fuit sententia, opium in extremo gradu frigidum esse, sive corpus frige facere, cum tamen in humido & calido vita radicetur. Ipse *Hippocrates Lib. de flat. sect. I. p. m. 41. ait. hypnoticis frigefaciendi vis inest, a qua sanguis frigesit: & eapropter cum calidis illud esse miscen-*



scendum judicarunt. Unde si evolvimus vetustissimas quas opium ingreditur, compositiones, complura calida ibi mixta videbis, nempe aromata, imo ipsum piper, Zingiber, euphorbium, pyrethrum, semen erucæ &c. sicuti id apparet in diascoridio Fracastorii, philonio Persico, Mesue, philonio majore Nicolai, ipsaque theriaca. Deinceps, quoniam observabant ab opiatīs præcordiorum anxietates, animi deliquia, vertiginem, capitis torporem ac stuporem, hinc cordiali, confortante ac cephalica virtute præstantia miscebant, & hac ratione succurrere istis noxis studebant: unde videmus hinc inde electuariis, laudanis, extractis, confectionibus admixtum cinnamomum, essentiam citri, oleum cinnamomi, lignum aloës, semen citri, ambram, moschum, terram Lemniam, bolum Armeniæ, magisterium perlarum, matris perlarum, coralliorum, crocum: item ex cephalicis nardum Indicum, schoenanthum, stœchadem Arabicam, styracem calamitam, nardum Celticam, cardamomum, cubebas, castoreum, opobalsamum, flores lavendulæ, salviæ, rosmarini. Præterea, si quis evolvere & paulo accuratius examinare quævis hinc inde prostantia ex opio composita velit, utique deprehendet, complures ineptas mixturas, sine ulla ratione factas, dum ex farragine multorum inertium & inter se repurgnantium, & ubi unum alterum destruit, invicem confarcinata sunt, ut inepta hac medicamentorum compositione veterum, in vera theoria, & principiis genuinis physicis, quæ vera medica sunt, ignorationem abunde demonstrent. In alexipharmacum scopum plura videbis adornata ex opio & variis creditis bezoardicis, cephalicis, alexipharmacis, viperinis, scordio &c. Non negare in totum volumus, theriacam, aliaque alexipharmaca opiata in certis malignis & venenatis morbis quandoque locum invenire posse: nam temerarium esset experientiam per tot secula penitus velle pernegare atque rejicere; illud tamen non possumus non monere, compositiones has longe concinniori, meliori ac tutiori potuisse via, scopo,  
hoc



hoc, institui. Equidem contractiorem theriacam ante aliquot lustra, non sine laudabili more, nonnulli præstantes Chymiatri efficere sunt conati: verum si fateri rem licet, & nimis diffusa mixtura est, copiaeque ingredientium, etiam incongruorum, laborat. Non de nihilo est, theriacam hæc, quæ nomine venit cœlestis, commode & compendiose, imo secure in quibusvis morbis per se vel cum aliis medicamentis posse misceri & propinari; maxime ubi fluxiones nimiae sunt sistendæ, & impetus motuum refrænandus. At meliori adhuc virtute gaudebit, si selectioribus ac paucioribus tantum ingredientibus præparetur. Non possum quin hic compendiosam talem theriacam *nulla mihi unquam intermissione pietate colendi Excellent. Domini Præsulis* commendem, quam ipse jam olim Mindæ Westphalorum, & Halberstadii introduxit in pharmacopœas, & per multo annosibi praxin exercens probatissimam invenit: Compositio eius videre est in notis ad *Poter. p. 669.*

### §. XIII.

Tandem, si verum fateri licet, ex omnibus compositionibus veterum, laudanis, præparatis, extractis, & correctionibus vix unica mihi placet, maxime propter diffusam & inertium quoque ingredientium farraginem & copiam. Et, utut theriaca & Diascordium Fracastorii non ignobili virtute sese, si recte adhibeantur, commendent, meliori tamen, tutiori & concinniori ratione hæc omnia posse perfici nullus dubitabit, qui experientiam & rationem pro fundamento habet. Quodsi autem rem paulo consideremus attentius, non ex alio fundamento correctionis, cuius in finem compositio instituitur, ratio peti ac duci debet, quam ex eo unico, quod est hoc: Opium potenti pollet motus machinæ nostræ sistendi facultate: Ne itaque vis noceat corpori, sistens quodammodo re-

tun-



tundatur, sive ad æquilibrium & temperamentum redigatur eum in finem cum iis quæ motus faciunt & promovent in corpore, misceatur? ut ex duobus hisce, nempe motum sistente & promovente remedio, quasi neutrum desideratissimæ virtutis producat. Insulsum quidem primo intuitu videtur, talia, quæ e diametro sibi opposita sunt, invicem miscere, cum unum alterum sua privet activitat: attamen experientia in plurimis remediis contrarium docet, exsurgere nempe hac ratione sæpius præstantissima ac divinæ virtutis remedia: sic v. gr. videmus sal succini acidum cum sale cornu cervi urinoso mixtum, duo esse contraria, nihilominus constituere expertissimæ virtutis remedium: in mixtura simpl. tincturis bezoardicis, acida mixta sunt cum alexipharmacis calidis, sale volatili acri subtili turgidis, & hac ratione exoptatissima hinc resultat medicina; mercurius, summe penetrans & volatile corpus, cum auro fixioris indolis decenter mixtus, incomparabilem, in chronicis morbis, constituit medicinam, Tacemus salia neutra egregiæ efficaciam, quæ tamen ex acido & alcali composita sunt. Proinde non incon-sultum esse arbitror, cum sudoriferis, iisque alexipharmacis, item cum purgantibus, miscere opium. Olim in hoc districtu Practicus celeberrimi nominis vixit, *Keulingius*, qui instar panacæ usurpavit in chronicis & acutis morbis, ut *Manuscripta* docent *Beati Frider. Hoffmanni*, constantem ex spiritu C. C. volatili probe rectificato, & essentia opii tincturam. Ita etiam Lipsiæ virum practicum famigeratissimum in frequentissimo usu spiritum C. C. cum essentia anodyna, etiam in acutis morbis habere, certe scio. Bezoardica tinctura Michaelis, magnifici nominis viri, recipit quoque opium: Omittimus theriacalia & notissima alexipharmaca Diascordii, Fracastorii, Sylvii, theriacam coelestem, Andromachi, theriacam de citro, suscipere omnia in se opium, variaque alexipharmaca & diaphoretica. Quod autem tam ve-

D

teres,



teres, quam hodierni Medici opium alexipharmacis permiscuerint, hæc mihi causa videtur, ut nempe eo felicius in peste, febrium acutissima, imo in haustis venenis maximum impetum sanguinis & spirituum, quem tenuissima hæc corpora machinæ inferunt sollicitando naturam, sive principium movens musculos, paululum moderarentur. Nam extra dubium est, effrenem & nimium motum, secretionem & excretionem, quæ tamen intenditur, plane pervertere, & officium quoque glanduloso- rum emunctoriorum perturbare: ideo, sunt verba *solidissimi Olai Borrichii de somno & somniferis p. 31. nihil mihi securius observatum in peste, quæ urbi nostræ A. MDCLIV. ferocissime incubuit, sola theriaca, sed liberalius, non improvide tamen, propinata. Plures enecti, qui drachmam hauserant, etiam subinde drachmæ geminæ nihil afferant opis, eoque in adultis nonnunquam ad tres ascendendum fuit, non sine periculo quidem, minus tamen, quam malum ipsum periculoso. Vivit apud nos hodieque celebris Musicus, Joh. Ericius, quem tum lue illa sæviter correptum hoc modo, propitio Numine, restitui. Prætera, eandem theriacam in vomitu, alvi fluxu, diarrhoea, symptomaticis, nec non dysenteria, tam externe, quam interne, desideratissimam opem ferre, & vulgo notum est. In rheumatismis, capitis erysipelate, odontalgia, otalgia, nil præsentius invenit, Dn. Præses, quam essentias alexipharmacas cum laudani liquidi aliquot guttulis roboratas, debita & repetita dosi porrectas, quod etiam in catarrhalibus febribus, arthriticis affectibus, interpositis etiam aliis non est de nihilo: Ex compositis Diaiscordium F. licet inepta appareat ejus compositio, egregii usus est, quod cum lap. prunellæ & diaphoreticis mixtum frequentissimo in usu olim habuit Exc. Dn. Præses, etiam in ipsis lenioribus pleuritidis febribus, in ætate maxime juvenili. Approbamus itaque, & unam ex optimis commendamus mixtionis methodum opii, nempe cum alexipharmacis & sudoriferis.*



## §. XIV.

Provolvitur jam ad alterum mixtionis modum, qui est cum purgantibus: videtur & hic modus plane absonus, & a ratione alienus, cum opium purgantium sistat effectum, sed fuit vetustissimus mos hæc inavicem combinare. Ipse *Galenus Lib. VIII. de comp. med.* laudat pharmacum quoddam Asclepiadis stomachi vitiis opponendum, quod inter cætera recipit, nardum, costum, psyllium, rosam, aloën, asarum. Postea frequenti in usu habuerunt purgantium cum opio miscelam optimi Medici, præf. in compescendis doloribus, qua de re legi potest *Rondeletius Lib. XI. cap. XXVI. Deodatus in Valetudinario, p. 191.* Ipse *Poterius* in dolore oculorum inveterato nihil præsentius invenit, quam pilulas suas catholicas, cum aliquot granis opii correcti mixtas, optatissimo insecuto successu. *Riverius* passim in *praxi & observationibus*, in funestissimo dolore colico, purgantes pilulas cum laudani opiatum uno vel altero grano miscet. Idem facit *Thonner. lib. 3. obs. 5.* id quod etiam sæpius in *praxi* præstitit *Exc. Dn. Præses*, & observavit, primo ex usu harum pilularum dolorum mitigationem, post XII. horas alvus deinde fuit soluta & sudor subsequutus. *Horstius* in febrium intermittentium, præcipue quartanæ paroxysmis, præparato prius corpore, mixturam præmittit ex helleb. nigri extracto, laudanoque opiato, addito tartari vitriolati & antimonii diaph. momento. Imo in colica *Tilemannus* laudat opiatam solutivis lenientibus mista, & *Rudius* addito diagrydio; ut & *Capivaccius* aliis purgantibus in eodem affectu. De connubio opiatorum cum purgantibus hæc habet Ingeniosus *Pechlinus obs. 62. p. 363.* *Insulsissima, fateor, videtur purgantium cum opiatæ mixtura, & tamen sunt, qui in doloribus colicis hystericisque feliciter se illa usos jactitant, imo novi olim Empiricum, qui aloës, helleb. opiique conjugio magna cum nominis celebritate medicinam faceret.* Cognatæ illi sunt *Rhumelii* pilulæ antipodagricæ, nunc quoque famosæ, nec destituyente fortuna. Vocatæ fuerunt dictæ hæc pilulæ,





*Veni Amice, Surge & Ambula: & sic fiunt: R. M. P. Aloëphang. drach. ii. Laud. opiat. drach. semis. has pilulas compertas prædicat Ettmull. in Comment. ad Schræd. in paroxysmo colico, in quo sedando vim eis magnam tribuit Stockerus. Dn. Præs. aliquot experimentis in doloribus dentium mirabiles eas deprehendit, talem autem correctionem earum fecit R. Extr. M. P. Aloëph. ser. i. extr. opii, camphor. ana gr. j. M. pro j. dosi. Famosæ pilulæ Wildegansi recensendæ quoque sunt & sic se habent: R. opil depurati unc. ij. corall. r. ppt. croci, troch. de viper. myrrh. el. aloes socotr. ana. drach. ij. auri fulm. drach. j. olei caryoph. gtt. XX. f. l. a pil. ex drachma j. 90. obduc. auro. Notabile hoc loco est, & as pilulas præter virtutem anodynâ, simul etiam diaphoreticam possidere: observatione enim compertum habemus, opium cum purgantibus mixtum non modo sedare tumultuarios motus, sed & alvum, sudorem, imo urinam, pro ratione circumstantiarum, ducere. Monenda etiam adhuc quædam restant circa pilulas Matthiæ Starckii, de quibus extat peculiaris liber Belgico idiomate conscriptus: Conficiuntur autem seq modo: R. Extr. opii unc. semis, spir. terebinth. cum sale tartari diligenti tritura in saponiformem substantiam mutati drach. j. extr. helleb. nigri drach. ij. extr. glyzyrrh. drach. iij. Novissima compositio recipit etiam pulveris hellebori albi drach. j. Ultra, hæc invicem accurate primo tritu, postea in digestionem leniori ac diuturniori conjunguntur ac miscentur: ita evadit massa quæ provide ad certa grana exhibita, morborum, præf. chronicorum, indicationibus exacte satisfacit, crebrioribus vicibus eam adhibuit sæpius laudatus Excellentissimus Dn. Præs. & expertus inde est, quod non modo alvum apertam simul fervaverint, sed & torpor capitis, vertigo, somnolentia, quæ alias opiatorum usum subsequi solent, plane non fuerint animadvertita. Celeberrimus Ettmull. in diss. de virt. opi diaph. scribit de iis, ipsas, crebriori experientia confirmatas, plus in recessu habere, quam ut obiter a Willisio in pharm. rat. P. I. Sect. VII. cap. 3. ad Empiricorum remedia sint referendæ.*



## §. XV.

Præterea, opiata medicamenta, tam liquida, quam solida, pro variis indicationibus, varioque scopo, & morborum circumstantiis, cum aliis quoque remediis percommode possunt remisceri. Ita in affectibus hysterico - spasmodicis laudanum liquidum opportunissime cum ess. castor. croci, succin. & spiritu salis ammoniaci propinatum, optatissimam fert opem, una cum linimentis anodynis atque carminativis; in epilepticis & convulsivis pathematibus, cum ess. moschi, ambraë, castorei, succini, spiritu salis ammoniaci, summo cum fructu & effectu administratur; in doloribus atrocissimis calculi non semel, sed pluribus vicibus anodyna expertus est probatissima *Excell. Dn. Præses*. Matrona hujus loci honesta quæ 56. annum jam superavit, tribus vicibus, singulis fere annis infestata fuit gravissimis doloribus ex calculo renum, quibus urinæ suppressio, convulsiones, visus & sensuum imminutio accesserunt, unicum & certissimum solamen experta est a clysteribus oleosis, & a medicamento quod constabat ex tinctura tartari, laudano liquido, ess. castorei & ess. croci ana mixtis: post aliquot hujus remedii successive administratas doses mitigata fuerunt symptomata & calculos successive excrevit. Cæterum ad somnum placidum conciliandum in iis qui vigiliis & laboribus debilitati fuerunt, laudanum liquidum, seu *Sydenhamii*, seu *Jones*, cum elæosacharo cinnamomi, cort. citri, ambra, moscho mixtum, quod etiam ad effectum aphrodisiacum simile vix reperiet, erit effectus præsentissimi.

## §. XVI.

Ultimo loco pernecessarium erit quasdam, circa opiatarum usum, subnectere cautelas. Non negari potest, in foro medico graviores & frequentiores non committi errores, quam cum dictis his remediis: hinc si in ullo administrando remediorum, genere cautione opus est, profecto valet in opia-



tis. Primo enim deprehendimus, nonnulla individua plane contrariari & adversari medicamentis ex opio, ita ut tam in statu sano, quam ægroto, etiam in minima dosi, ipsa ferre nequeant, sed mox gravativi ventriculi dolores, diaphragmatis compressiones, animi defectiones, debilitates, torpor, extremorum perfrigerationes inde sequantur. Etenim in eo peculiare quid habent ipsæ non modo nationes, sed & temperamenta & ætates, ut non quodvis medicamentum, neque alimentum æque bene ferre possint. Probe scribit *Borrichius l. c.* *Nostratum corporibus, quæ pituitosi frequentius sunt habitus, statim insidiatur, nisi agas circumspectissime. Populi ad Orientem, item Afri, ferent longe facilius; imo Germanos videas non raro minus inde periclitari, quam nostros.* Quam ob causam verissime ait *Hippocrates*: natura a natura differt, corpus a corpore: unde prudentiæ Medici est, singulares individuorum habitudines probe scrutari. *Secundo*, ad hanc sedantium & sistentium usum non facile deveniendum est, nisi necessitas postulat, & enormes, & excessivæ commotiones spirituum periculum virium & vitæ minitentur. *Tertio*, perpetua hæc esse debet regula: si compescere nimios motus lenioribus, v. g. nitrosis, acidulis, emulsionibus seminis papaveris & aliis ex papavere paratis possumus, neutiquam ad opiata, multo minus ad narcotica esse confugiendum: Adeoque valet ibi vetustissimus & verissimus canon *C. Celsi*: non deveniendum ad validiora remedia, si imbecilliora sufficiunt. *Quarto*, in motibus criticis, quales sunt omnis generis febres, in quibus natura, secundum veteres, sive sapientissimum structura humanæ artificium, motu intensiori secludere vel corrigere nititur peccantem materiam, cautissime cum opiatis mercandum est: & rarius, nisi in principio, nunquam autem circa statum & tempus criseos, exhibenda sunt. Sæpius accidit, ut variolarum, morbillorum, purpuræ, erysipelatis materia maximos tumultus efficiat, nec egredi velit, ubi experientia id confirmante, non tantum



um acidulæ & nitrofa, fed & papaveracea & leniora opiata efficaciffimam produnt virtutem. *Quinto* in omnibus malignis morbis, ubi malignitas intra fanguinem ex pravo fanguinis & humorum vitio, nascitur atque concipitur, nunquam hæc ipfa felicem fuiffe finem confequuta, a Practicis notatum fuit. *Sexto* in gravioribus inflammationibus, præfertim peripnevmonia, gangræna partium, inflammatione hepatis, fecuriffime abftinemus ab opiatis, nec non in omnibus fubjectis ubi ftatus fanguinis & humorum plethoricus & cacochymicus adest. *Septimo*, in affectibus quoque cerebri & nervorum frigidis, affectibus chronicis, hydrope, afthmate, eorum ufus plane fit interdictus.

### §. XVII.

Ufum autem egregium inveniunt, ipfa experientia, ad quam confugimus, teſte, in nimis doloribus, & graviffimis inde naſcentibus ſymptomatibus, quæ ex læſionibus, nervorum diſtortionibus, tendinoſarum partium ſauciationibus, vulnerationibus, ambuſtionibus, exulcerationibus, adeoque a cauſa externa proveniunt. *Secundo* in exceſſivis colicæ & calculi doloribus, dentium dolore, dentitione difficili, otalgia, gravibus rheumatismis, prudenter associata ſudoriferis, vel purgantibus, egregium uſum habent. *Tertio*, in ferina & ſicca tuſſi, falſis deſluxionibus, hæmoptyſi, vomitu enormi, diarrhœa, dyſenteria, dolore hæmorrhoidum, doloribus iliâcis promittunt inſignem efficaciam, aliis tamen non neglectis. Sed quoniam egregie hac re deſunctus eſt, *Laudatiſſimus Olaus Borrichius in Tr. de ſomno & ſomnif.* ubi ſolide & præctice genuinum opiatorum uſum & abuſum tradit, hinc Lectorem Benevolum eoremittimus, cum nullum ſciamus, qui cum meliori iudicio & experientia hac de re ſcripſerit.

**TANTUM.**



